



**Sud Bosne i Hercegovine
Суд Босне и Херцеговине**

**Broj: S1 3 P 038034 20 Iž
Sarajevo, 23.10.2020. godine**

IZVORNİK!

Sud Bosne i Hercegovine, u drugostepenom vijeću sastavljenom od sudija Vesne Trifunović kao predsjednika vijeća, Srete Crnjaka i Dinke Bešlagić-Čovrk kao članova vijeća, odlučujući o žalbi Terezije Batinić, Krupa bb, Gornji Vakuf – Uskoplje, BiH, koja osporava odluku Centralne izborne komisije BiH broj 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasnje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 23.10.2020. godine, donio je

RJEŠENJE

Žalba se odbija.

Obrazloženje

Odlukom Centralne izborne komisije Bosne i Hercegovine broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine jer nisu ispunjeni uslovi propisani odredbom člana 3.15 stav 1, 2 i 3 Izbornog zakona Bosne i Hercegovine.

Protiv ove odluke žalbu je izjavila Terezija Batinić u kojoj navodi da istu osporava jer se njeno ime ne nalazi na popisu birača koji glasaju iz inostranstva. Ukazuje da je dostavila ispravno popunjene obrasce uz kopije važećih dokumenata. Predlaže da se žalba usvoji te da joj se omogući da glasa putem pošte.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana jer žaliteljica uz prijavu za glasanje izvan BiH nije dostavila zakonom propisani dokaz o identitetu.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluka Centralne izborne komisije BiH kojom je odbijena prijava Terezije Batinić za upis u izvod iz Centralnog biračkog spisa za glasanje izvan Bosne i Hercegovine jer imenovana uz prijavu nije dostavila važeći identifikacioni dokument. Time nisu ispunjeni uslovi propisani članom 3.15. stav 1 Izbornog zakona (Sl. glasnik BiH br.23/01 sa izmjenama) da se državljanin Bosne i Hercegovine koji privremeno živi u inostranstvu, nađe na izvodu Centralnog biračkog spiska za glasanje van zemlje budući da član 5.12 stav 4 istog zakona propisuje da je važeća lična isprava za birače, lična karta BiH, pasoš BiH i vozačka dozvola BiH.

Centralna izborna komisija Bosne i Hercegovine u osporavanom rješenju pravilno je utvrdila činjenicu da žaliteljica uz prijavu za glasanje izvan BiH nije dostavila ni jedan važeći zakonom propisani dokument o identitetu. Uz prijavu priložena kopija vozačke dozvole Kanade ne smatra se dokazom o identitetu predviđen Izbornim zakonom, te je prilikom odlučivanja CIK BiH pravilno primjenio zakonsku odredbu koja propisuje uslove za prihvatanje prijave za glasanje van BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Vesna Trifunović